

Morning Dogri (NSD) Bulletin 15-03-2026

1. प्रधानमंत्री नरेंद्र मोदी अज्जै थमां शुरू होने आले My Bharat Budget Quest-2026 प्रतियोगिता दे राज्य ते केंद्र शासत प्रदेश स्तर दे जेत्तुएं कन्नै गल्लबात करडन।
2. जम्मू-कश्मीर पुलस नै साबका मुखमंत्री ते जम्मू-कश्मीर नेशनल कांफ्रेंस दे अध्यक्ष डॉ. फारूक अब्दुल्ला हुंदे पर होए दे हमले दे मामले च जांच आस्तै बशेष जांच टीम सिट खडेरी ऐ।
3. अमरीका दे राष्ट्रपति डॉनल्ट ट्रम्प होरें तेहरान आसेआ होर्मुज जल डमरू मध्य गी सुरक्षित रखनेकरी प्रभावत होए दे देशें गी अपने युद्धपोत उत्थे भेजने दी गुजारश कीती ऐ।
4. ईरान दे बदेश मंत्री अब्बास अराघची होरें आखेआ ऐ जे रणनीतिक तौर पर महत्वपूर्ण होर्मुज जल डमरू मध्य अंतरराष्ट्र शिपिंग आस्तै चालू ऐ पर अमरीका ते ईजराइल गी उत्थुआं लंगघने दी इजाजत नेई ऐ।
5. भारत नै अफगानिस्तान दे इलाके च पाकिस्तान दे ब्हाई हमलें दी सख्त निंदेआ कीती ऐ।
6. हैदराबाद च कल खेड्डे गेदे एफ.आई.एच महिला हॉकी विश्व कप क्वालीफायर दे फाइनल च इंग्लैंड थमां हारने दे बाद बी भारत नै महिला हॉकी विश्व कप लेई अपनी थाह पक्की करी लैती ऐ।



प्रधानमंत्री नरेंद्र मोदी अज्जै थमां शुरू होने आहले My Bharat Budget Quest-2026 प्रतियोगिता दे राज्य ते केंद्र शासत प्रदेश स्तर दे जेतुएं कन्नै गल्लबात करडना। इस पैहल दा मकसद युवाएं गी केंद्री बजट उप्पर चर्चा करने ते विकसित भारत दे निर्माण पर अपने बचार सांझे करने लेई प्रोत्साहित करना ऐ। इस कार्यक्रम दा लक्ष्य युवा प्रतिभाएं गी सैहभागी शासन ते आर्थिक नियोजन कन्नै जोड़ना ऐ। एहदे कन्नै गै एहू पैहल नीति निर्माण च युवा पीढ़ी दी भूमिका गी मजबूत करने ते 2027 तगर आत्मनिर्भर विकसित भारत दे निर्माण च जोगदान बी देग। माई भारत बजट प्रतियोगिता-2026 च 12 लक्ख शा मते युवा प्रतिभागिं हिस्सा लैता ते 47 ज्हार निबंध जमा कीते गे।

<><><><><><>

JK-SIT

जम्मू-कश्मीर पुलस नै साबका मुखमंत्री ते जम्मू-कश्मीर नेशनल कांफ्रेंस दे अध्यक्ष डॉ. फारूक अब्दुल्ला हुंदे पर होए दे हमले ते हत्या दी कोशश दी जांच आस्तै 7 सदस्यें दी बशेष जांच टीम सिट दा गठन कीता ऐ। एहू टीम जम्मू-साम्बा-कठुआ रेंज दे पुलस उप महानिदेशक हुंदी निगरानी च कम्म करोग। टीम गी मामले दी व्यापक जांच करने ते इसी तय समें च पूरा करने दे निर्देश दित्ते गए ना। एहू घटना 11 मार्च गी पेश आई ही, उसलै फारूक अब्दुल्ला होर जम्मू च इक ब्याह समारोह च शामिल होने लेई गेदे हे। आई.जी.पी जम्मू जोन भीम सिंह टूटी हुंदे निर्देश पर इस टीम दा गठन कीता गेआ ऐ।

<><><><><><>

US-Prez.

अमरीका दे राष्ट्रपति डॉनल्ड ट्रम्प होरें तेहरान आसेआ होमुर्ज जल डमरू मध्य गी सुरक्षित रखने करी प्रभावित होए दे देशें गी अपने युद्धपोत भेजने दी गुजारश कीती ऐ। सोशल मीडिया दी इक पोस्ट च ट्रम्प होरें चीन, फ्रांस, जपान, दक्खन केरिया ते ब्रिटेन सने होरनें देशें गी अपील कीती ऐ जे ओहू होमुर्ज च अपने युद्धपोत भेजना उनें आखेआ ऐ जे अमरीका, समुंद्री कंडे आले इलाकें च बम्बारी जारी रक्खग ते ईरानी जहाजें ते किश्तिएं गी निशाना बनांदा रौहग। ध्यानजोग ऐ जे जंदी 28 फरवरी गी अमरीका ते इजराइल नै सांझे तौरा पर ईरान पर इक बड्डा हमला शुरू कीता हा ते ईरान दी जवाबी कार्रवाई दे कन्नै हुन एहू जंग पूरे खाड़ी इलाके च फैली गेदा ऐ।

<><><><><><>

Iran FM-

ईरान दे विदेश मंत्री अब्बास अराघची होरें आखेआ ऐ जे रणनीतिक तौर पर महत्वपूर्ण होमुर्ज जल डमरू मध्य अंतरराष्ट्री शिपिंग आस्तै चालू ऐ पर अमरीका ते इजराइल कन्नै जुडे दे जहाजें गी इस रस्ते राएं लंगघने दी इजाजत नेई ऐ। उंदी एहू टिप्पणी हालिया फौजी घटनाएं दे बाद क्षेत्र च बधी दी तनोतनी दे चलदे आई ऐ। इक अमरीकी केबल न्यूजी चैनल गी दित्ते गेदे इंटरव्यू च अराघची होरें आखेआ जे एहू समुंद्री रस्ता पूरी चाल्ली बंद नेई कीता गेआ ऐ। ईरान दे मंत्री हुंदा एहू दावा ऐसे समें पर आया ऐ जिसले केई भारती जहाज बी उत्थे फंसे दे ना।

<><><><><><>

India-Condemn Pak.

भारत नै अफगानिस्तान दे क्षेत्र च पाकिस्तान दे ब्हाई हमले दी निंदेआ कीती ऐ। इनें हमलें च केई नागरिकें दी मौत होई गेई ते केई सारे ढांचे गी नुकसान पुज्जा ऐ। सोशल मीडिया दी

इक पोस्ट च मंत्रालय दे प्रवक्ता रणधीर जायसवाल होरें आखेआ ऐ जे एहू पाकिस्तानी बवस्था आसेआ कीता गेदा इक होर हमला ऐ। एहू अफगानिस्तान दी विचारधारा दे प्रति शत्रुतापूर्ण हमला ऐ। जायसवाल होरें आखेआ जे भारत अफगानिस्तान दी सम्प्रभुता ते क्षेत्रीय अखंडता गी पूरी चाल्ली सम्मान दित्ते जाने आहली गल्ल गी दोहरांदा ऐ।

<><><><><><>

FIH-Hockey

हैदराबाद च कल खेड्डे गेदे एफ.आई.एच महिला हॉकी विश्व कप क्वालीफायर दे फाईनल मुकाबलेच भारत गी इंग्लैंड थमां 2-0 कन्नै हार दा सामना करना पेआ। हालांकि खरी गल्ल एहू ऐ जे इस हार दे बावजूद भारत नै इस बरें होने आले महिला हॉकी विश्व कप लेई अपनी थाह पक्की करी लैती ऐ। इस प्रतियोगिता दे राहें चैंपियन इंग्लैंड, उपविजेता भारत ते कन्नै गै स्काटलैंड नै बी महिला हॉकी विश्व कप लेई क्वालीफाई करी लैता ऐ। महिला हॉकी विश्व कप दा आयोजन इस बरें 14 थमां 30 अगस्त तगर नीदरलैंड्स ते बेल्जियम च मर्दे दी टूर्नामेंट दे कन्नै सांझे तौर पर कीता जाहगा।

<><><><><><>

Weather

मौसम विभाग नै आखेआ ऐ जे जम्मू-कश्मीर च औंदी 20 मार्च धोड़ी मौसम दी स्थिति च मता उतार-चढ़ाव दिक्खने गी लब्बग। इस अवधि दरान पदरे इलाकें च रूकी-रूकियै बरखा ते उच्चिं धारें पर बर्फबारी होग। स्हाढे संवाददाता नै जानकारी दित्ती ऐ जे अज्ज ते कल बी मौसम आमतौरा पर खुशक रौहग पर कल संझांलै अंधी-झक्खड झुलने ते एहूदे मगरा कल रातीं ते 16 मार्च गी बड्डुलै किश थाहें पर हल्की थमां दरम्याने दर्जे दी बरखा बरने ते

बर्फबारी होने दे असार ना। एह्दे परैंत औंदी 17 थमां 20 मार्च धोड़ी मौसम बदलोखड़ा बने दा रौह्ग ते इस दरान बरखा यां बर्फबारी दे असार बने दे रौह्डन।

<><><><><><>

Prog. Announcement

आकाशवाणी जम्मू दे क्षेत्रीय समाचार एकांश आसेआ कल 16 मार्च गी “राश्ट्री टीकाकरण दिवस-2026” दे मौके पर 25एं मिंटे दा इक विशेश कार्यक्रम प्रसारित कीता जाह्ग- जेह्दा विशे होग “टीकाकरण जागरुकता राएं सार्वजनिक सेहत गी निग्गर बनाना”। इस विशेश कार्यक्रम दा प्रसारण दपैहरी 12 बजे कीता जाह्ग ते एह्दे च स्हाड़े परौहने होडन- जम्मू-कश्मीर सरकारै दे सेहत विभाग दे राज्य टीकाकरण अधिकारी डॉक्टर शाहिद हुसैन- जेह्डे इस चर्चा राएं अपने माहिराना बचार सांझे करडन। इस कार्यक्रम दी मेजबानी मेरे यानि विजय बजाज आसेया कीती जाह्ग।

<><><><><><>